

# სტუდენტთა სარეიტინგო სისტემა

გზამკვლევი

სოციალურ მეცნიერებათა ფაკულტეტი

---

# სარჩევი

პროგრამის აღწერა

სარეიტინგო სისტემაში მონაწილეობის პირობები

სარეიტინგო სისტემაში მონაწილეობის პროცედურები

ქულათა დაგროვების პრინციპი

ტერმინთა განმარტება

## პროგრამის აღწერა

სტუდენტთა სარეიტინგო სისტემა (შემდგომში „სარეიტინგო სისტემა“) არის სოციალურ მეცნიერებათა ფაკულტეტის მიერ ინიცირებული პროექტი, რომელიც გულისხმობს სტუდენტების რეიტინგის შედგენას კლასგარეშე აქტივობების მიხედვით როგორც უნივერსიტეტში, ისე მის ფარგლებს გარეთ.

სარეიტინგო სისტემის ძირითადი მიზანია სტუდენტთა რეიტინგის განსაზღვრა წინასწარ დადგენილი კრიტერიუმებისა და მათთვის მინიჭებული კონკრეტული ქულების საშუალებით ხდება. ამასთან, აღსანიშნავია, რომ დაჯამებულ ქულათა მაქსიმუმი წინასწარ არ არის განსაზღვრული, რეიტინგის ყველაზე მაღალი ქულა სკალირდება და გაუტოლდება 100% (მაგ: თუ რეიტინგის სათავეში მყოფი სტუდენტი დააგროვებს პირობითად 150 სარეიტინგო ქულას, სკალირების შედეგად ის გაუტოლდება 100%. ხოლო სხვა სტუდენტების ქულები გამოითვლება მასთან შეფარდებით).

**პროექტის ვადები:** სარეიტინგო სისტემაში მოსახვედრად სტუდენტი განაცხადს აკეთებს ყოველი სემესტრის დასაწყისში - რეგისტრაციის დაწყების დღიდან **ორი კვირის** განმავლობაში. 6 თვის მანძილზე სტუდენტს ეტაპობრივად შემოაქვს მოთხოვნილი დოკუმენტაცია, რის საფუძველზეც გროვდება მისი სარეიტინგო ქულა.

სტუდენტთა რეიტინგი გამოქვეყნდება ფინალური გამოცდების დასრულებიდან ერთი კვირის ვადაში. სარეიტინგო ქულების საფუძველზე სტუდენტები მომდევნო სემესტრის (6 თვის) წახალისდებიან და ისარგებლებენ სხვადასხვა უპირატესობით .

*ქულათა დაგროვების პრინციპი:*

სტუდენტი ქულებს აგროვებს განაცხადის გაკეთების დღიდან (შემოდგომის სემესტრი) მიმდინარე წლის 31 დეკემბრის ჩათვლით. სტუდენტის საბოლოო ქულა შედგება **ორი ნაწილისგან: აკადემიური მოსწრების წილი 40%-ია, ხოლო სკალირებული ქულის 60%.**

**სკალირებული ქულის დაანგარიშება:** სხვადასხვა კრიტერიუმის დაკმაყოფილების შედეგად სტუდენტი აგროვებს სარეიტინგო ქულებს, რომელთა მაქსიმუმი დამოკიდებულია მის მიერ სემესტრის განმავლობაში განხორციელებულ აქტივობებზე. სემესტრის ბოლოს ხდება

დაგროვებული ნედლი ქულების სკალირება და 100-ბალიან სისტემაში გადაყვანა. რეიტინგის საბოლოო ქულაში შედის აღნიშნული წესით დათვლილი ქულის 60%. (დანარჩენი 40% კი სტუდენტის აკადემიურ მოსწრებაზე (GPA) მოდის).

*სარეიტინგო სისტემის უპირატესობები:*

- რეიტინგის შედეგა ხდება ფაკულტეტის ყველა მიმართულებისა და სექტორის სტუდენტებისთვის;
- სარეიტინგო ადგილების გათვალისწინებით ფაკულტეტი აწესებს სხვადასხვა საჩუქარსა და წამახალისებელ აქტივობებს:
  - რეიტინგის სათავეში (პირველ ადგილზე) მყოფი სტუდენტი მომდევნო სემესტრის განმავლობაში ყოველთვიურად მიიღებს 100-ლარიან სტიპენდიას;
  - რეიტინგის მეორე და მესამე ადგილზე გასული სტუდენტები მიიღებენ სწავლის გადასახადზე დამატებით 10%-იან ფასდაკლებას; იმ შემთხვევაში, თუ მეორე ან მესამე ადგილზე გასულ სტუდენტს სრულად აქვს დაფინანსებული სწავლის გადასახადი (არ იხდის სწავლის საფასურს), სწავლის გადასახადზე ფასდაკლების ნაცლად ექნება შოსუს-ს ტრენინგ ცენტრში მისთვის სასურველი კურსის უფასოდ გავლის შესაძლებლობა;
  - რეიტინგის მეოთხე, მეხუთე და მეექვსე ადგილზე გასული სტუდენტები შეძლებენ შოსუს-ს ტრენინგ ცენტრში მათთვის სასურველი კურსის უფასოდ გავლას;
  - რეიტინგში მეშვიდე, მერვე, მეცხრე და მეთათე ადგილზე გასული სტუდენტები მიიღებენ წიგნების მაღაზიის 50-ლარიან სასაჩუქრე ბარათებს;
  - რეიტინგში პირველი ოცდახუთი ადგილის მფლობელი სტუდენტი მონაწილეობას მიიღებს ფაკულტეტის მიერ სპეციალურად მათთვის განხორციელებულ პროექტებში, ექსკურსიებში, აკადემიურ და სხვა შემეცნებით ღონისძიებებში.
- რეიტინგის სათავეში მყოფი სტუდენტები წახალისდებიან და დამატებით ისარგებლებენ შემდეგი უპირატესობებით:
  - სტაჟირებებისა და დასაქმების პროგრამებში მონაწილეობა;
  - გაცვლით პროგრამებში მონაწილეობა;
  - კონფერენციებში, მოდელირებებზე, ბანაკებსა და სხვა პროექტებში მონაწილეობა უნივერსიტეტის მატერიალური მხარდაჭერით;
  - სხვადასხვა საორგანიზაციო ჯგუფში მონაწილეობა;
  - სხვა ad hoc შემთხვევებში.

## სარეიტინგო სისტემაში მონაწილეობის პირობები

**სარეიტინგო სისტემაში მონაწილეობის მისაღებად სტუდენტი:**

- უნდა ირიცხებოდეს სოციალურ მეცნიერებათა ფაკულტეტზე (კურსის, სექტორის, პროგრამის განურჩევლად);
- ჰქონდეს მაღალი აკადემიურ მოსწრება, არანაკლებ 75 ქულისა;
- წარმოდგენილი დოკუმენტაცია უნდა შეესაბამებოდეს დადგენილ თარიღებს. (იხ. დანართი №1 და № 2). *გთხოვთ, გაითვალისწინოთ, რომ თუ სტუდენტი საბუთებს არ წარმოადგენთ წინასწარ განსაზღვრულ ვადებში, მას კონკრეტულ კრიტერიუმში ქულა არ მიენიჭება. აუცილებელია, რომ ღონისძიებების გამართვის თარიღი ემთხვეოდეს მიმდინარე სემესტრს.*

## სარეიტინგო სისტემაში მონაწილეობის პროცედურები

იმისათვის, რომ სტუდენტი ჩაერთოს სტიპენდიის კონკურსში, მან უნდა გაიაროს შემდეგი პროცედურა:

- სემესტრის დასაწყისში ის წერს განცხადებას სტუდენტთა სარეიტინგო სისტემაში მონაწილეობის შესახებ (იხ. დანართი №1);
- სემესტრის განმავლობაში სტუდენტი ეტაპობრივად წარმოადგენს ქულების დასაგროვებლად საჭირო დოკუმენტაციას. ყოველი ახალი დოკუმენტის საფუძველზე მას ემატება შესაბამისი ქულა;
- სემესტრის ბოლოს სტუდენტთა განცხადებებს განიხილავს და საბოლოო გადაწყვეტილებას იღებს ფაკულტეტის საბჭო;
- ფინალური გამოცდების დასრულებიდან ერთი კვირის ვადაში რეიტინგი გასაჯაროვდება, ხოლო შესაბამის სტუდენტებს ეცნობებათ წამახალისებელი ღონისძიებების შესახებ;
- წამახალისებელი ღონისძიებები მოქმედებს მომდევნო სემესტრის განმავლობაში.

## ტერმინთა განმარტება

- აკადემიური მოსწრება - სტუდენტის მიერ მიღებული საშუალო ქულა (GPA), არანაკლებ 75-ისა, რომელიც სარეიტინგო სისტემის 40% შეადგენს;
- კლასგარეშე აქტივობები - უნივერსიტეტის და სხვადასხვა ინსტიტუტის მიერ ორგანიზებულ ღონისძიებებში მონაწილეობა:
  - საჯარო ლექციები - დაითვლება საჯარო ლექციებისთვის განკუთვნილი სპეციალური ფორმის მიხედვით, რომელშიც დაფიქსირებულია სოციალურ მეცნიერებათა ფაკულტეტის ორგანიზებით ან თანაორგანიზებით განხორციელებულ საჯარო ლექციებზე დასწრების დამადასტურებელი ხელმოწერა;

- *ფაკულტეტის ორგანიზებით და/ან თანაორგანიზებით განხორციელებული მოდელირებები/სიმულაციები, ტრენინგები, ვორკშოპები, შეჯიბრებები, მრგვალი მაგიდის ფორმატის დისკუსიები, კონფერენციები.* კანდიდატმა უნდა წარმოადგინოს მონაწილეობის დამადასტურებელი დოკუმენტი, რომლის მიხედვითაც დაითვლება სარეიტინგო ქულა;
  - *საზღვარგარეთ ორგანიზებული მოდელირებები/სიმულაციები, ტრენინგები, ვორკშოპები, შეჯიბრებები, მრგვალი მაგიდის ფორმატის დისკუსიები, კონფერენციები.* კანდიდატმა უნდა წარმოადგინოს მონაწილეობის დამადასტურებელი დოკუმენტი, რომლის საფუძველზეც მას სარეიტინგო ქულა მიენიჭება;
  - *ფაკულტეტს გარეთ (უნივერსიტეტში და უნივერსიტეტის მიღმა) განხორციელებული მოდელირებები/სიმულაციები, ტრენინგები, ვორკშოპები, შეჯიბრებები, მრგვალი მაგიდის ფორმატის დისკუსიები, კონფერენციები.* კანდიდატმა უნდა წარმოადგინოს მონაწილეობის დამადასტურებელი დოკუმენტაცი, რომლის საფუძველზეც მას სარეიტინგო ქულა მიენიჭება.
- **კლასგარეშე მოხალისეობრივი აქტივობები** - სტუდენტის მიერ შეტანილი წვლილი უნივერსიტეტის ინსტიტუციურ განვითარებასა და კლასგარეშე აქტივობების განხორციელებაში; სტუდენტი უნდა აკმაყოფილებდეს შემდეგი ქვე-კრიტერიუმებიდან ერთ-ერთს:
- *კლუბის პრეზიდენტის პოსტი* - უნივერსიტეტში მოქმედი კლუბების ეფექტური ხელმძღვანელობა, რომელიც დადასტურდება კლუბების ხელმძღვანელის რეკომენდაციით; კრიტერიუმის დასაკმაყოფილებლად აუცილებელი მოთხოვნაა პრეზიდენტის მიერ კლუბის ფარგლებში განხორციელებული მინიმუმ ორი ღონისძიება, რომელიც ფაკულტეტის საქმიანობის თემატიკას ეხმიანება;
  - *ორგანიზაციული მხარდაჭერა* - სტუდენტთა ჩართულობა ფაკულტეტის მიერ ორგანიზებული სხვადასხვა მასშტაბის ღონისძიების დაგეგმვასა და განხორციელებაში. სტუდენტს ქულა მიენიჭება კონკრეტულ ღონისძიებაზე პასუხისმგებელი პირის რეკომენდაციის საფუძველზე;
  - *განხორციელებული ინიციატივები* - სტუდენტს, სტუდენტთა ჯგუფს ან ფაკულტეტის მიმართულებებზე მოქმედი კლუბების წარმომადგენლობებს შეუძლიათ ინიციატივით მიმართონ ფაკულტეტის საბჭოს. ამ უკანასკნელის რეკომენდაციის შემთხვევაში პროექტის ავტორებს დაევალებათ აღნიშნული ინიციატივის განხორციელება შესაბამის ვადებში. კანდიდატი უნდა იყოს პროექტის ავტორი ან თანაავტორი;
  - *არაპროფესიული მოხალისეობრივი მოღვაწეობა* - სტუდენტი, რომელიც არის მოხალისე არასამთავრობო ან სხვა ტიპის ორგანიზაციაში; ან ასრულებს ნებისმიერ (არაანაზღაურებად) სამუშაოს, რომელიც არა არის დაკავშირებული პროფესიულ განვითარებასთან, თუმცა დაფუძნებულია მოხალისეობრივ

პრინციპებზე და ემსახურება სამოქალაქო აქტივიზმის განვითარებას. საქმიანობის დამადასტურებელი დოკუმენტის წარმოდგენის შემთხვევაში სტუდენტს მიენიჭება სარეიტინგო ქულა<sup>1</sup>;

- **დამატებითი პროფესიული აქტივობები** - სტუდენტის პროფესიული მოღვაწეობა უნივერსიტეტის მიღმა, რომელიც შინაარსობრივად დაკავშირებულია იმ სპეციალობასთან, რომელსაც ის ეუფლება სოციალურ მეცნიერებათა ფაკულტეტზე; სტუდენტი, უნდა აკმაყოფილებდეს მინიმუმ ერთ ქვე-კრიტერიუმს:
  - *არაანაზღაურებადი აქტივობები* - კანდიდატი, რომელიც ეწევა სპეციალობასთან დაკავშირებულ არაანაზღაურებად საქმიანობას და წარმოდგენს შესაბამის დოკუმენტაციას;
  - *ფაკულტეტისგან დამოუკიდებლად განხორციელებული პრაქტიკა/სტაჟირება* - კანდიდატი, რომელიც გადის პრაქტიკას ან სტაჟირებას სპეციალობის განხრით სამთავრობო, არასამთავრობო, საერთაშორისო თუ კერძო დაწესებულებაში, წარმოდგენს შესაბამის დოკუმენტაციას;
  - *დასაქმება* - კანდიდატი, რომელიც დასაქმებულია სპეციალობის განხრით წარმოდგენს შესაბამის დოკუმენტაციას;
  - *სტატიები და პუბლიკაციები* - კანდიდატი, რომელიც წარმოდგენს მიმდინარე სემესტრში კონფერენციაზე, ჟურნალში ან სხვა პროექტის ფარგლებში გამოქვეყნებულ სტატიას ან პუბლიკაციას, მიენიჭება შესაბამისი სარეიტინგო ქულა.
- **სხვა აქტივობები** - მხოლოდ ფაკულტეტის საბჭოს გადაწყვეტილებით, შესაძლებელია მოხდეს იმ დოკუმენტების განხილვა, რომელიც არ შეესაბამება ზემოთ ჩამოთვლილ არცერთ კრიტერიუმს; სტუდენტის განცხადების საფუძველზე დამატებით აქტივობებში შესაძლოა მონაწილეობდეს:
- ✓ *ენის სერთიფიკატი* - სტუდენტი წარადგენს ენის სერთიფიკატს (TOEFL/IELTS; DELF (diplôme d'études en langue française)/DALF diplôme approfondi de langue française; TestDaF (Test Deutsch als Fremdsprache) და ა.შ.)
- ✓ *სხვა სერთიფიკატი* - დასაშვებია მხოლოდ ფაკულტეტის საბჭოს გადაწყვეტილებით იმ შემთხვევაში, თუ სტუდენტი ფლობს დამატებით სერთიფიკატს, და/ან ასრულებს დამატებით რაიმე სახის სამუშაოს, რაც არ შეესაბამება ზემოთ ჩამოთვლილ არცერთ კრიტერიუმს. სტუდენტი მიმართავს ფაკულტეტის საბჭოს განცხადებით აღნიშნული აქტივობა „სხვა სერთიფიკატის“ კატეგორიაში განიხილოს.

---

<sup>1</sup>დოკუმენტაციის წარდგენის პირობები განისაზღვრება ინდივიდუალურად შესრულებული სამუშაოს სპეციფიკის გათვალისწინებით სტუდენტის მიერ ფაკულტეტის საბჭო სახელზე დაწერილი განცხადების საფუძველზე.